



Kalaallit qimmiata aammalu qimussersuaqartoqartarneratalu qanoq ililluni kulturikkut piujuartinneqarsinnaaneri pillugit Naalakkersuisut misissueqqullugit peqquneqarnissaannik inatsisartut aalajangiiffigisassaattut siunnersuut. Susassaqartut peqatigalugit misissuineq ingerlanneqassaaq, misissuinerlu inatsisartunut agguanneqarumaarluni.

(Inatsisartunut ilaasortaq Doris J. Jensen, Siumut)
(Siullermeerneqarnera)

Inatsisartuni ilaasortap Doris J. Jensenip siumumeersup siunnersuutaanut qujanaq, sammisaq soqutiginarloq pillugu demokraatiniit imaattumik oqariartuuteqarusuppugut.

Siullermik qimminik qimuttunik qimmeqartut tamaasa qujaffigerusuppakka – qimmeqarneq inuttut soqutigisaavoq imminut piuaffiginermik akisussaaffimillu annertuumik malitseqartoq. Qimmiliveqarnermut piunasaqaatit naammassiniagassaapput, qimmeqarnermi nerukkaatissaqartitsineq imissaqartitsineq minnerunngitsumillu qimusserneq, qimussernermilu atortut, qimminillu perorsaanerit ingerlattarpasi – tassuunakkut annertuumik kulturitsinnik piujuartitsissuugassi qujanaq.

Qimmit qimuttut inatsisitigut illersugaanerat pingaaruteqartorujussuavoq. Sulili annerusumik illersugaanera qulakkeertariaqaripput piffissami kingullermi uppersarvarput. Tassami uanga aggerfinit Qeqertarsuarmiit qimminik allanertanik eqqussisimasoqarneranik pasittaassisoqarneratigut takusinnaagatsigu inatsisitigut illersuinerput sulii ullumernit ersarinnerullunilu sukanganerusariaqartoq. Tamanna suliaasaq demokraatiniit suleqataaffigissavarput.

Kulturimik piujuartitsinissaq qiviarutsigu ...

Siullertut kulturitsinnik eriaqarsariaqartunik piujuartitsinissarput pingaaruteqarpoq. Kulturitsinnik piujuartitsineq nukittuumik inissisimassappat sumiiffinni inuit qimminik qimuttunik pigisallit, qimmillu pillugit peqatigiiffinni suliniaqatigiiffinnilu suliat nukittuut pisariaqartippagut.

Siunnersuuteqartup oqaatigaa misilittakkanngooq takutippaat avannaata qimussersua ingerlanneqareersimaleraangat qimmeqarneq siuariartoqqilersartoq ilaatigut soqutiginninneq annerulerluni – tamanna misilittagaqarfigineqarpat ajunngilaq. Kisitsisilli naatsorsueqqittaarfiup takutitai qissimilaaraanni takuneqarsinnaavoq qimminik qimuttunik qimmeqarneq 1998-mi qaffariarujussuarsimanagerat eqqaassanngikkaanni qimmeqarneq appariartuinnaavissimavoq – tamannalu ernumanartutut oqaatigerusuppara.

Ernumanarpoq qimmit qimuttut ikiliartuinnavimmata, sulilu ikinnerulissappata qimmillu akuneqattaaliornissaannut periusissuunngikkutta qimmeq qimuttoq aarlerinartorsiuulersinnaavoq.

Taamaattumik kulturimik piujuartitsinissaq pimoorukkumallugu allaanerusumik eqqarsartariaqarsorinarpoq. Tassami qimminik qimuttunik qimmeqarneq tassaaginnanngimmat sukkaninneq, takonarissanik qimussiussineq, nerisitsinerluunniit.



Isumaqarpunga qimmeqarneq ilaatigut tassaasoq inuunermik pitsaaliuineq, ussartunut pinaveersaartitsissutaasinnaasoq. Qimmeqarneq akisussaaffiuvoq tassuunakkullu meeqqat akisussaaffeqarneq ilinniarfigilluarsinnaavaat. Kulturi atorlugu akisussaaffimmik ilinniartitsineq aqutissaalluarpoq.

Qiviarsinnaasatta ilagaat qimmiliveqartarneq – qimmiliviit illoqarfiup avataannut inississorneqarnerat qimmeqarnerup kajungernarneranut eqquinerlutik?

Demokraatiniit qimmeq qimuttoq qimussersuaqartoqartarneralu qanoq ilillutik kulturikkut piujartinneqarsinnaanerat pillugu misissuisoqarnissaa tapersorsorparput.

Suliniutit assigiinngitsut nutaamillu eqqarsarneq pigisariaqalerpagut.

Suliassaq pimoorunneqaqqullugu aaliangiiffigisassatut siunnersuut taama isikkoqartillugu aappassaaniigassanngornissaa innersuupparput.